



REPUBLIKA E SHQIPËRISË  
KOMISIONERI PËR TË DREJTËN E INFORMIMIT DHE MBROJTJEN  
E TË DHËNAVE PERSONALE

Nr. 379/4 Prot

Tiranë, më 13.05.2016

**VENDIM**

Nr. 20, datë 13.05.2016

Në mbështetje të neneve 29, 30 dhe 32 të Ligjit nr. 9887, datë 10.03.2008, "Për Mbrojtjen e të Dhënave Personale" i ndryshuar, Ligjit nr. 8485, datë 12.05.1999, "Kodi i Procedurave Administrative të Republikës së Shqipërisë" i ndryshuar, si dhe provave të administruara në ngarkim të kontrolluesit "Spitali Rajonal Fier", me aktivitetin e tij në formën ligjore person juridik,

**VËREJ SE :**

Në zbatim të Urdhrit nr. 69, datë 18.03.2016 të Komisionerit për të Drejtën e Informimit e Mbrojtjen e të Dhënave Personale, është kryer hetim administrativ pranë kontrolluesit "Spitali Rajonal Fier", me objekt:

- Zbatimi nga ana e kontrolluesit "Spitali Rajonal Fier", i Ligjit nr. 9887 datë 10.03.2008, "Për Mbrojtjen e të Dhënave Personale" i ndryshuar, dhe akteve të miratuara nga Komisioneri gjatë kryerjes së aktivitetit të tij, në lidhje me masat për sigurinë e të dhënave personale, në zbatim të nenit 27 të ligjit.

Nga hetimi administrativ i kryer pranë këtij kontrolluesi, nga grupi i inspektimit është konstatuar:

1. Kontrolluesi nuk ka rregullore të veçantë/specifike për mbrojtjen e të dhënave personale.
2. Në kontratën individuale të punës, kontrolluesi nuk ka të parashikuar "Deklaratën e Konfidencialitetit", nënshkruar nga punëmarrësit sipas Vendimit nr.6 datë 05.08.2013, ku numri i punëmarrësve të kontrolluesit që aksesojnë të dhëna personale në forma të ndryshme, është i konsiderueshëm.
3. Ka sistem video-survejimi (CCTV) dhe janë vendosur tabelat informuese mbi prezencën e tij, por nuk ka rregullore për funksionimin e këtij sistemi.

4. Konstatohet se në arshivën fizike (kartoteka) nuk ka kushte të përshtatshme për ruajtjen e dosjeve fizike dhe gjithashtu nuk ka rregullore për funksionimin e kësaj strukture, aksesin në të dhëna etj.

Për shkeljet e konstatuara, është mbajtur procesverbali i kontrollit administrativ, datë 26.04.2016, në të cilin përfaqësuesi i kontrolluesit nuk ka paraqitur pretendime.

Në zbatim të neneve 93 e vijues të Ligjit nr. 8485/1999 "*Kodi i Procedurave Administrative të Republikës së Shqipërisë*", më datë 09.05.2016 është organizuar seanca dëgjimore me përfaqësuesit e kontrolluesit lidhur me konstatimin e grupit të kontrollit administrativ, përpara marrjes së vendimit përfundimtar.

Në seancën dëgjimore, përfaqësuesja e kontrolluesit paraqiti pretendimet e mëposhtme:

- Kërkojmë kohë për zbatimin e detyrimeve ligjore sa i përket shkeljeve të konstatuara nga grupi i kontrollit.

Në lidhje me pretendimet e kontrolluesit, Komisioneri bën me dije se:

- Kontrolluesi ka njoftuar pranë Zyrës së Komisionerit në lidhje me përpunimin e të dhënave personale, në zbatim të neneve 21-22 të Ligjit nr. 9887 datë 10.03.2008 "*Për Mbrojtjen e të Dhënave Personale*" i ndryshuar, më datë 09.05.2011 dhe për këtë arsye, ka pasur gjithë mundësinë për t'u njohur me ligjin, detyrimet që rrjedhin nga ky ligj dhe aktet e tjera nënligjore.

Si përfundim, shkeljet e konstatuara gjatë hetimit administrativ në kuptim të nenit 39.1 shkronja "*dh*" e Ligjit nr. 9887 datë 10.03.2008 "*Për Mbrojtjen e të Dhënave Personale*" i ndryshuar, përbëjnë kundërvajtje administrative dhe sanksionohen me gjobë, si më poshtë:

- "*dh) Kontrolluesit ose përpunuesit, që nuk marrin masat e sigurisë së të dhënave dhe nuk zbatojnë detyrimin për ruajtjen e konfidencialitetit, të përcaktuara përkatësisht në nenet 27 dhe 28 të këtij ligji, dënohen me nga 10 000 deri në 150 000 lekë.*"

Kontrolluesi, Spitali Rajonal Fier, në formën ligjore të aktivitetit të tij është person juridik dhe, sipas nenit 39/2 për kundërvajtjet e mësipërme, dënohet me dyfishin e gjobës së përcaktuar në pikën 1 të këtij neni.

Për zgjedhjen e masës së gjobës, Komisioneri ka parasysh faktin se shkeljet e konstatuara janë serioze, pasi konsistojnë më moszbatim të ligjit, akteve nënligjore dhe parimeve bazë të mbrojtjes së të dhënave personale. Ato lidhen me cënimin e sigurisë së të dhënave personale të subjekteve të të dhënave "*pacientë*".

#### **PËR KËTO ARSYE:**

Në zbatim të neneve 27, 28, 39/1/shkronja "*dh*" dhe 39/2, të Ligjit nr. 9887, datë 10.03.2008 "*Për Mbrojtjen e të Dhënave Personale*" i ndryshuar,

## V E N D O S A :

1. Dënimin e kontrolluesit "Spitali Rajonal Fier", me gjobë në vlerën **100 000 (njëqind mijë) lekë** për shkelje të detyrimit të përcaktuar në nenin 27 të Ligjit nr. 9887, datë 10.03.2008 "Për Mbrojtjen e të Dhënave Personale" i ndryshuar.
2. Dënimin e kontrolluesit "Spitali Rajonal Fier", me gjobë në vlerën **100 000 (njëqind mijë) lekë** për shkelje të detyrimit të përcaktuar në nenin 28 të Ligjit nr. 9887, datë 10.03.2008 "Për Mbrojtjen e të Dhënave Personale" i ndryshuar.
3. Kontrolluesi "Spitali Rajonal Fier", të marrë masa duke krijuar kushte të përshtatshme teknike dhe organizative për ruajtjen e dokumentacionit fizik të kartelave shëndetësore të pacientëve në arshivën fizike, në zbatim të Udhëzimit nr. 23 të Komisionerit "Për përpunimin e të dhënave personale në sektorin e shëndetësisë".
4. Kontrolluesi "Spitali Rajonal Fier", të marrë masa duke krijuar kushte të përshtatshme teknike dhe organizative për funksionimin e sistemit të video-vëzhgimit (CCTV), në zbatim të Udhëzimit nr. 3 të Komisionerit "Për përpunimin e të dhënave me sistemin e video survejimit në ndërtesa dhe mjedise të tjera" si dhe Udhëzimit nr. 23 të Komisionerit "Për përpunimin e të dhënave personale në sektorin e shëndetësisë".
5. Kontrolluesi, "Spitali Rajonal Fier", të realizojë pajisjen e kontratave të punëmarrësve me Deklaratat e Konfidencialitetit sipas Vendimit nr.6, datë 05.08.2013, brenda një periudhe prej 30 ditësh.
6. Gjoha arkëtohet nga kundërvajtësi në Buxhetin e Shtetit, jo më vonë se 30 (tridhjetë) ditë nga komunikimi i këtij vendimi. Me kalimin e afatit të ankimit, ky vendim kthehet në titull ekzekutiv dhe ekzekutohet në mënyrë të detyrueshme nga zyra e përmbarimit.
7. Kundër këtij vendimi mund të bëhet ankim në Gjykatën Administrative të Shkallës së Parë, Tiranë, brenda 30 (tridhjetë) ditëve nga komunikimi i këtij vendimi.

Ky vendim u shpall sot, më 13.05.2016

**Besnik DERVISHI**  
  
**KOMISIONERI**